

La Dertgira nauscha 1998

A Mustér ei vegniu teniu era ier sera l'usitada dertgira tscheivvila

■ (gac) Sco usitau han ils responsabels dalla Dertgira nauscha, che ha liug mintgami gliendisgis tscheiver a Mustér, era tratg uonn bilanza dil curriu e passau duront igl onn vargau.

Tractai publicamein ein vegni cun quella caschun secapescha mo ils menders cass e quei per mussar cun tgei problems che la Dertgira nauscha sto sefatschenttar el decuors d'in onn. Quella spera denton da tucchar silmeins empau la noda e sche pusseivel aunc derscher empau benzin el fiug. La Dertgira nauscha ha supplicau explicitamein quels e quellas ch'èin vegni numnai e honorificai da buca fierer la faultsch el canvau e calar da s'exponer. Cass cuntrari luvrassi la Dertgira nauscha per dominum clavella.

Naven dil plaid digl onn entochen al premi cultural

Ils derschaders dalla Dertgira nauscha da Mustér han taxau la «quota da fritgeivladad» dalla «Bunaluna» dil Radio Romontsch per il plaid digl onn. Plinavon han els era fatg ina proposta concreta co Mustér e Sedrun savessen accellerar il tempo da contractivas per la fusiun da quellas duas regiuns turisticas. Numnadamein da mirar per in castellan sco il Gurtner.

Ch'ìls exponents indigens dalla politica vegnan truai ei evident. Per *Gioni Schwarz*, deputau e vicepresidente dil Cussegl grond, seigi l'Uniun europea ina teila cotschna. Schwarz hagi matei tema dalla grondezia nunsurveseivla dalla UE perquei ch'el hagi gia problems da s'orientar el Grischun. Quel hagi numnadamein pretendiu publicamein ed avon la féffa dalla meffa dalla politica dil Grischun che Cazas s'audi tiel Cumin da Razén.

Sper mistrals, partidas politicas, instanzas communalas, ils candidats per la Regenza, la ludoteca, La Quotidiana, il golf, la problematica da parcadis ed il consum extrem da biera dils da Tujetsch astga era il castellan dalla pressa grischuna, Lebrument, secapescha buca muncar. Ils sindicats hagian supriu il monopol, culla «Monopolschweiz». Quei plaigi insumma buca a Lebrument. Quel fetschi tut il pusseivel da saver stampar era quella gasetta. La fin finala hagi era el finanziau igl emprer numer e quei cullas pagas ch'el hagi pagau a ses collaboratur, che quels hagian allura duvrau per pagar las contribuziuns als sindicats, che quels hagian allura duvrau per stampar la gasetta.

Dals Cantins als Cantats

La cumpra d'objects per il diever communal ei medemamein vegnida tractada dalla Dertgira nauscha. Trun fetschi era da Medel sco ils da Mustér, ha ei giu num. Era quels cumprien la miseria dils auters. Fertion che Mustér hagi cumprau la Casa Capeder ed il Central e sch'ins havessi saviu era aunc il hotel Acla da Fontauna, veglien ils da Trun far culla Casa Desax in center communal, che cuosti in milliun daplì che quel ch'eri previus sigl agen areal. Era al miedi da Trun, al qual ei vegn renfatschau ch'el gudogni milliuns, vegni fatg entiert. Quater femnas hagian scret alla gasetta che quel seigi atgnamein in pauper giavel. Sch'ins lavuri 24 uras a gi, sappi ins gnanc dar ora ils daners.

La Casa da tgira Fontauna, l'OES, la Banca Raiffeisen, la Lìgia romontscha, scribents e redactors vegnan era tratgs tras il tschariesch dalla Dertgira nauscha. Gnanc ils Cantins ein stai segirs dils derschaders:

*Pli baul cu ei eran giuvens e fins, seclamavan ei ils «Cantins»
ussa ch'igl ei mo vegls plein flads
fuss ei meglier da dir ils «Cantats»*

Schebein ei ha giu num si ni giu cun la Dertgira nauscha 1998 ei buca stau d'eruir avon la fin da redacziun.



Ina suletta gada ad
onn en acziun. Quei ei
il destin dils derscha-
ders dalla Dertgira
nauscha da Muster. 10